



# Letšatši la Tebo la mathomo sekolong

Sepedi

Maxwell N Mamathuba



# **Letšatši la Tebo la mathomo sekolong**

Mongwadi ke Maxwell N Mamathuba  
Moswantšhi ke Ntibile Zonke





Tebo o tla be a eya sekolong la mathomo ka Mošupologo. O tla ya Phoraemari ya Mogodi, moo mogolo wa gagwe wa lesogana, Kanyane a tsenago gona.

Ka Lamorena o šaletše go ya malaong ka lebaka la gore o be a thabile.

O beile phensele le dikherayone tša gagwe ka mokotlaneng wa gagwe, le ge mogolo wa gagwe a mmoditše gore a ka se di hloke.

Tšeо a bego a di hutša di be di tloga di lokile kudu.



Tebo o tsogile mosong kudu ka Mošupologo.  
O be a tloga a tsogile e sa le ka pela go feta  
matšatši a mangwe.

Ka morago ga go hlapa a apara yunifomo  
ya sekolo gomme a ja sefihlolo sa gagwe  
ka potlako.

Mmagwe o be a mo tshepišitše go ba iša  
sekolong ka ge e be e le letšatši la gagwe  
la mathomo.

O be a tla sepela le mogolo wa gagwe  
ka koloing yeo e mo išago sekolong le  
barutwana ba bangwe.

Tebo o be a ekwa gore Kanyane o a ba  
diegiša go ya sekolong.

Ka fao, a mmitša, “Ebla Kanyane, a re ye!  
E sego fao re tla šalela.”



Ba tseña ka koloing ya mmagobona gomme  
ba leba sekolong.

Tseleng Tebo o be a bolela ka mokgwa wo a  
ilego go ipshina kua sekolong.

Kanyane a mo lemoša gore sekolong go  
fapanā le kheretšheng,

Go na le melao yeo e swanetšego go latelwa  
kua sekolong, gomme bao ba tshelago  
melao ba a otlwa.

Se sa nyaka go fokotša lethabo la Tebo,  
eupša mmagwe a re: “O se tshwenyege Tebo,  
o tla hwetša bagwera ba baswa.”



Ka morago ga go otlela lebakanyana, ba  
fihla kgorwaneng ya sekolo sa Phoraemari  
ya Mogodi.

"Kanyane, sekolo sa gago ga se kgole kudu le  
gae!" Tebo a realo.

A bona bana ba bantši, ba bangwe ba  
felegeditšwe ke bommagobona mola ba  
bangwe e le botatagobona.

Go be go na le dikoloi tše dintši, dikolointefe le  
dipese tseo di bego di tlisitše bana sekolong.

Barutwana ba bagolwanyana ba be ba  
sepela ka dihlopha, ba boledišana ba thabile.



Kanyane a bontšha mmagwe kantoro ya hlogo ya sekolo, gomme ba ya gona le Tebo. Ge ba fihla ka kantorong, ba hwetša lekgarebe le letelele le dutše setulong sa go dikologa.

MmagoTebo a fana ka Karabo ya kamogelo ya kgopelo yeo ba e amogetšego.

Ka morago ga go bala lengwalo, hlogo ya sekolo ya kgopela Tebo go batamela go yena, gore a mmotšiše se sengwe.

Seo se ile sa dira gore Tebo a ikwe a tšhogilenyana.

Ka morago a mmotšiše dipotšišo tše bonolo bjalo ka leina la gagwe, a batswadi ba gagwe le moo a dulago gona.



**MOGODI  
PRIMARY  
SCHOOL**



Ge ba etšwa ka kantorong ya hlogo ya sekolo,  
ba hwetša Kanyane a ba emetše ka ntle.

A šupetša mmagwe kantorong ya  
mongwaledi, moo a bego a eya go yo lefela  
sekolofisi.

Ge mmagobona a sepela, Tebo a nyaka go  
sepela le yena gomme a thoma go lla.

Kanyane a mo homotša gomme a mmontšha  
phapoši ya gagwe. A be a mmontšha le  
phapoši yeo e lego ya gagwe.



# MOGODI PRIMARY SCHOOL



Tebo a hwetša bašemane ba babedi bao a tsenego khretšhe ye tee le bona ngwageng wo o fetilego.

A ya go bona gomme ba thoma go kganyoga sekolo: ka moo e lego se segolo ebile se lego se sebotse ka gona.

Ba itlhaloša ka moo ba kgotsofetšego go ba karolo ya sekolo se sebotse.

Ge ba sa bolela bjalo ka lethabo, gwa tšwelela bašemane ba babedi ba ba golwanyana ba lebile go bona.

Ba ba botšiša maina a bona le gore ba dula kae, gomme ba araba.

Bašemane bale ba bagolwanyana ba thoma go ba kwera ba re, "Mo ga se khretšhe, le se ke la thaba kudu."



Ka mahlatse, tšipi ya lla, gomme bohle ba kitimela dithapelang.

Thapelo e swarelwa go lapa la sekolo, pele ga kantoro ya sekolo.

Barutiši ba bontšha barutwana moo ba swanetšego go fola mothaladi gona le mokgwa wa gona.

Ba thoma ka go opela difela tše pedi; lengwalo la balwa gomme gwa rapelwa.

Hlogo ya sekolo a amogela barutwana ka moka gomme ka morago ga moo a ba fa ditsebišo.



“Sekolo sa rena se thoma ka iri ya bošupa le metsotso ye masometharo (7:30) ka mehla, gomme ga go na le yo a swanetšego go šalela.

Le se ke la lahlela dipampišana lebatong, le di lahleleng ka dikotikoting tša matlakala, gore lefelo la rena le dule le hlwekile.

Le sepele godimo ga mebila yeo e lokišitšwego le efoge go gata mašoba le bjang.

Se se tla kgonthiša gore bjang bja rena le mašoba di dule di le botse.

Ka nako ya go khutša le swanetše go raloka ka thoko yela.”

Aa

Bb

Cc

Dd

Ee

Ff


Gg

DAYS OF THE WEEK

- Sunday
- Monday
- Tuesday
- Wednesday
- Thursday
- Friday
- Saturday

MONTHS OF THE YEAR

- January
- February
- March
- April
- May
- June
- July
- August
- September
- October
- November
- December



Ka morago ga thapelo, barutwana ba leba  
diphapošing tša bona ka go fapafapana.

Ba sepela ka methaladi, ba šalane morago,  
ba sa kitime.

Ge Tebo a tsena ka phapošing ya gagwe, a  
se hwetše yo a mo tsebago.

A ikgethela moo a tla dulago gona  
mothalading wa bobedi go tloga ka pele  
gomme a thoma go lla.

Mošemane yo motelele a tla a dula kgauswi  
le Tebo a mo homotša.



## CALENDAR



Morutišigadi a tsena ka phapošing a swere lenaneo la barutwana ka moka.

Morutiši a re, “homola ngwanaka, sekolo se tla tšwa ka pela, ga go bjalo?”

Tebo a dumela ka hlogo a se sa lla.

Ka morago ga go bitša maina ka moka, a ba bea ka dihlopha.

Morutišigadi o be a le bogale efela e le mosadi wa go loka.

O be a sa rate go kgala morutwana makga a mantši ka taba ye tee.



Morutišigadi a botša barutwana gore ba tlie go ipshina ka go ithuta.

Ga a rate barutwana bao ba nyakago go raloka ka nako ya dithuto.

O tla ba ruta go bala le go ngwala, gomme mmogo ba tla atlega.

O tla ba ruta dipalo gore ba kgone go bala palo ya dilo.

“Pele nako e telefala le tla kgona go bala go tloga go 1 go iša go 20, naa seo ga se sa loka?” Barutwana ba araba ka gore, “Ee, se lokile!”



Tšhipi ya lla gomme morutiši a re ke nako ya go tšwela ka ntle go yo ja le go ikhutša.

Barutwana ka moka ba leba ka ntle gomme ka morago ga go ja ba ya go raloka.

Tebo a hwetša bagwera bale ba gagwe ba kgale gape.

A ba iša go Thabang, mošemane yo a dulago kgauswi le yena ka phapošing.

Ke ka mokgwa wo a ilego a hwetša mogwera yo moswa, gomme ba dula ba raloka mmogo ka bone bja bona go tlogela moo.



Tšhipi ya lla gape, gomme ba kitimela ka diphapošing tša bona.

Morutiši a ba fa dipuku tša diswantšho tša dilo tše di fapafapanego.

A ba fa dipampiri le dikherayone gomme a ba kgopela gore ba thale le go fa mmala diswantšho tša dilo tšeо ba di nyakilego.

Ka morago ga moo a tšeа diswantšho tša bona a di kgomaretša lebotong.

Barutwana ba be ba thabile ba ikgodiša ka gore mošomo wa bona wa bokgabo o fegilwe lebotong.



Ge tšhipi e lla gape, morutiši a tsebiša gore dithuto di fedile, gomme o tla ba bona letšatši le le latelago.

Tebo a kitimela phapošing ya Kanyane a ema lebating.

“Kanyane, dithuto di fedile, a re ye gae!”  
a goelela.

Phapoši ka moka ya hwa ka disego, eupša morutiši a botša Kanyane gore a ye go yena.

Ge ba fihla gae, o be a thabetše go botša batswadi ba gagwe ka mogwera wa gagwe yo moswa gore a ka se lebale letšatši leo.

Ge Kanyane a leka go anega ka moo a biditšego leina la gagwe, o be a fela a leka go mo homotša.

# DITEBOGO

**Mongwadi ke**

Maxwell N Mamathuba

**Moswantšhi ke**

Ntibile Zonke

**Molekodi ke**

Pandelani Claudine Rambau

Mukondeleli Constance Nembahé

Ndivhuwo Mulaudzi

**Mohlami ke**

PixelPing Design

**Mofetoši wa puke ke**

Maureen Ramusi

**Motsinkedi wa puku ke**

Makoma Phatudi



ISBN 978-0-638-00737-4



basic education

Department:  
Basic Education  
REPUBLIC OF SOUTH AFRICA

